



MINORANCIS EUROPEANIS... A SBREGHEBALON!



Che minorancis linguisticis e sport a ledin dacuardi benon, lu dimostre ad in plen la manifestazion Europeada, vâl a dî il Campionât European di balon des minorancis nazionâls autoctonis. L'event al è realizât de FUEN - Union Federâl des nazionalitâts europeanis - , fondade a Paris tal 1949 cu la volontât di preservâ e di promovî la identitât, la culture, i dirits e lis carateristicis unichis des minorancis europeanis. Di fat, des passe cuatricent minorancis in Europe, cuasi cent di chês a son dentri te FUEN, a rimarcâ la impuartance di unî lis fuarcis par multiplicâ il propri pês e par fâ in mût di diventâ (e se pussibil restâ) visibilis te maniere plui largje e produtive pussibile, massime ai voi des nazions e dai stâts teritoriâi plui grancj e ricognossûts.

La FUEN, che e lavore a pro de conservazion e de promozion des identitâts, de lenghe, de culture, dai dirits e des tradizions des minorancis europeanis, e je duncje la vôs des organizazions internazionâls des minorancis, massime dentri de Union Europeane e dal Consei di Europe, ma ancje tes Nazions Unidis e te OSCE (Organizazion pe Sigurece e pe Cooperazion in Europe).

La idee dal Campionât e poie su la constatazion che il sport al cree sedi spazis di confront che di union e condivision, spirt di competizion ma ancje sintiments di solidarrietât e di amicizie. Il balon, in particolâr, al è un sport privilegiât no dome par vie de sô presince a nivel mondiâl, ma ancje parcè che – si ben che a nivei alts al cjapi dentri

un mont dorât e cuasi artificiâl - tal stes timp nol domande sfuarçs par jessi praticât di cualsisedi frut o persone, in cualsisedi país o strade dal mont, ancje chê plui puare o isolade. In sumis, cuasi un paradòs par un lengaç universâl che po al sa veicolâ e compagnâ lis diferencis linguisticis e culturâls dai partecipants ae competizion de Europeada.

E duncje, si diseve, cheste idee di un campionât des minorancis e je someade dal moment une buine modalitât par tirâ la atenzion su la ricjece linguistiche e culturâl de Europe. Par chest, tal 2008 al è stât organizât pe prime volte l'event de Europeada, li che a àn partecipât vincj scuadris in rapresentance di tredis stâts europeans. Il campionât - che si davuelç ogni cuatri agns in maniere paralele al Campionât european di balon de UEFA - tal 2016 al è stât assegnât al Sud Tiròl, e dai 18 ai 26 di Jugn si è davuelçût in Val Badia (toponim par ladin e par talian, mentri che e je cognossude tant che "Gadertal" par todesc) e in Val Pusteria ("Pustertal" par todesc, e "Val de Puster" par ladin), cussì che a àn podût jessi coinvulçûts te organizazion sedi i sudtiroles di lenghe todescje che i ladins. Al campionât chest an a àn partecipât 24 scuadris masculinis, plui 6 femininis che, pe prime volte te storie de Europeada, a àn zuiât un lôr torneu.

L'aur tra i oms al è làt al Sud Tiròl, l'arint ae Ocitanie e il bronç ae scuadre de Koroška/Carinzie. Ancje pes feminis, i prins doi puescj dal podi sai son concuistâts propit il Sud Tiròl e la Oci-



tanie, mentri che la medaie pal tierç puest e je lade ae scuadre dal Rush-deutch (minorance che e fevele il todesc in Russie).

Dilunc de setemane de Europeada, dongje des com-

petizions sportivis si organizin ancje tantis manifestazions e events culturâi paralei che a presentin lis particolaritâts dai lûcs che a dan acet ae competizion, ma soreddut che a promovin lis singulis minorancis: in chest mût, chestis a vuadagnin un lôr spazi impuartant che ur permet di vè massime visibilitât ancje midiant dai media e dai struments tecnologjics plui modernis che vuê ur stan daûr aes competizions sportivis.

La Europeada e je duncje la manifestazion sportive plui impuartante par meti in mostre e dâ lustri aes particolaritâts culturâls e linguisticis des minorancis tant che chês che o vin par esempli in Friûl: chê furlane, chê slovene e chê gjermanofone. Al sarès une vore biel se si rivàs a meti adun une o plui scuadris di balon ancje in rapresentance dal nestri teritori cussì di jessi pronti pe edizion 2020 de Europeada e magari, ca di cualchi an, ospità propit in Friûl chest impuartant incuintri sportîf. Par informazions su la manifestazion: FUEN <https://www.fuen.org/>, <http://www.europeada.eu/>.

Linda Picco

Par cure di:

